



Savjeti za uspjeh na oba svijeta (Meka)

Hatib: dr. Abdullah ibn Avad el-Džuheni

10. redžeb 1446. godine po Hidžri / 10. januar 2025.

Sva hvala i zahvala pripadaju Allahu. Njega hvalimo, od Njega pomoć i oprost tražimo, i Njemu se utječemo od zla naših duša i naših loših djela. Koga Allah uputi, niko ga u zabludu ne može odvesti, a koga On u zabludi ostavi, niko ga ne može uputiti. Svjedočim da nema boga osim Allaha, jedinog, Koji druga nema, i svjedočim da je naš prvak i vjerovjesnik Muhammed, sallallahu alejhi ve sellem, Njegov rob i poslanik.

“O vi koji vjerujete, bojte se Allaha istinskom bogobojažnošću i nipošto ne umirite osim kao muslimani!” (Ali Imran, 102)

“O ljudi, bojte se Gospodara svoga, Koji vas je stvorio od jedne osobe, od koje je njen par stvorio, a od njih dvoje mnoge muškarce i žene rasijao. Bojte se Allaha, Čijim imenom jedni druge molite, i čuvajte rodbinske veze. Allah vas, doista, nadzire.” (En-Nisa, 1)

“O vjernici, bojte se Allaha i govorite samo istinu, On će vas za vaša dobra djela nagraditi i grijehе vam vaše oprostiti. A onaj ko se Allahu i Poslaniku Njegovu bude pokoravao – postići će ono što bude želio.” (El-Ahzab, 70–71)

Najistinitiji govor je Allahova Knjiga, a najbolja uputa je uputa Muhammeda, sallallahu alejhi ve sellem. Najgore stvari u vjeri su nove stvari, svaka nova stvar je novotarija, svaka novotarija je zabluda, a svaka zabluda vodi u Vatru.

O ljudi! Mudri i Uzvišeni Allah stvorio vas je da Ga obožavate i zadužio vas je djelima koja možete podnijeti, pa ih činite. Nije vas stvorio uzalud i besciljno, nego je stvorio smrt i život da vas iskuša koji će od vas bolje postupati. Propisao vam je u vjeri ono što je propisao, i upozorio vas je na zablude i novotarije. Bojte se Allaha tako što ćete ispunjavati Njegove naredbe, izbjegavati zabrane i velike grijehе, i slijediti njegove





upute i dokaze, koje je objavio u Kur'anu, da ih slijedite. Zaista je Kur'an jedna od najboljih opskrba za spas. U Kur'anu su propisane obaveze i preporučena djela, savjeti i opomene, dozvole i zabrane. Pa zašto se duše ne odazivaju na Njegove naredbe, zašto se ne klone Njegovih zabrana i ne prihvate opomene?

Zašto nisu svjesni Onoga Koji zna ono što čovjek u javnosti iznosi i što krije, i njegovu nutrinu i vanjštinu? Nemar ih je prekrrio, a strasti duše skrenule su ih od opomene. Prepuštaju se slastima zablude, a ne znaju gorčinu kazne kada dođe njeno vrijeme. Ustrajavaju u svojim grijesima, a ne boje se Dana kada će biti "ščepani" za noge i kike.

Na taj dan udvostručit će se kazna onima koji su ostavili namaz i nisu ga obavljali onako kako je propisano, koji su bili nemarni prema zekatu i odbijali da ga daju, povrijedili svetost mjeseca posta uzimanjem hrane i pića u danima ramazana (osim s opravdanim razlogom), i odgađali obavljanje hadža iako su bili u mogućnosti i nisu imali validan šerijatski razlog za to. Toga dana će oni koji su konzumirali alkohol biti napojeni nakupinom gnoja i znoja stanovnika Vatre, i osjetit će svu gorčinu kazne i patnje. Na bludnike i bestidnike ognjeni plamen će se prolivati, i bit će udarani bičevima po spolnim organima i pozadinama. Onaj ko uzima kamatu jest će s drveta Zekum.

Ni u jednom narodu neće se proširiti blud i kamata a da time sami sebi neće prizvati Allahovu kaznu. Tražimo zaštitu kod Allaha od Njegovog gnjeva i kazne. Silnici će ostati u žestokoj vrućini i ključaloj vodi i u crnom dimu.

Onaj ko je zauzet sobom, neće imati vremena za druge, i onaj ko gleda svoje greške, neće vidjeti tuđe. Obuzdajte svoje jezike, Allah vam se smilovao, i ne dozvolite im da kaljaju čast drugih ljudi. Zaista je Allah blizu i čuje svaku izgovorenu riječ, i onaj ko svojim jezikom ukalja čast svoga brata i povrijedi ga riječju ili djelom, Allah će mu biti protivnik. Uzvišeni Allah kaže: "A oni koji vjernike i vjernice vrijeđaju, a oni to ne zaslužuju, toware na sebe klevetu i pravi grijeh." (El-Ahzab, 58)





Šejh Ibn Usejmin, rahimehullah, rekao je: "To je kada vjernik doživi bol ili bude povrijeđen nekim postupkom ili riječju. Oni koji vrijeđaju i uznemiravaju vjernike, bez ikakvog razloga, sebi su natovarili klevetu, što je laž, i očiti grijeh koji vodi velikoj kazni. Tražimo od Allaha zaštitu." Neka ga Allah nagradi za svako dobro koje je učinio islamu i muslimanima.

Gospodaru, učini naše jezike čistim, a naša srca punim ljubavi prema vjernicima. "Gospodaru naš, oprosti nama i braći našoj koja su nas u vjeri pretekla i ne dopusti da u srcima našim bude imalo zlobe prema vjernicima; Gospodaru naš, Ti si, zaista, dobar i milostiv!" (El-Hašr, 10)

Allahu moj, zaštititi nas od strasti, od duše koja nagovara na zlo i od prokletog šejtana. Bojte se Allaha, o vjernici, i iskoristite priliku dok je imate, i nastavite s dobrim djelima dok su, uz Allahovu dozvolu, kabul. Prestanite s grijesima dok je životna nit još uvijek povezana.

Prekini, o samoobmanjeni, svoje puste nade, život je kratak. Iskreno čini svoja djela radi Allaha, jer On je svjedok. Napusti svoje greške, jer obračun je težak, i popravi se pokajanjem, da bi tvoj kraj bio dobar.

Imam Ahmed u svom Musnedu i Buhari u svom Edebul-mufredu, Allah im se smilovao, bilježe da je Poslanik, sallallahu alejhi ve sellem, rekao: "Budite milostivi, pa će i vama biti ukazana milost, praštajte, pa će i vama biti oprošteno. Teško onima koji samo slušaju (akmaul-kavli), i teško onima koji ustraju u grijesima, znajući šta čine." "Akmaul-kavli", spomenuti u hadisu, jesu oni koji slušaju govor, ali ga ne razumiju niti ga primjenjuju.

Uzvišeni kaže: "Zato obraduj robove Moje koji Kur'an slušaju i slijede ono najljepše u njemu; njima je Allah na Pravi put ukazao i oni su pametni." (Ez-Zumer, 17–18)

O muslimani i muslimanke, bojte se Allaha, da biste postigli ono što želite. Probudite svoje duše iz nemara i povedite ih putem spasa. Znajte da vas prati ono što vam je određeno, vaši dani na dunjaluku prolaze, a mrtvi oko vas bdiju. "Vi želite prolazna dobra ovoga svijeta, a Allah želi onaj svijet. Allah je silan i mudar." (El-Enfal, 67)





Zahvaljujte Allahu na Njegovim blagodatima, pa će vam povećati Svoje blagodati. Otvorio vam je vrata plemenitosti i dobrote, i stvorio vam iz Svoje milosti i dobrote teške oblake, budući da je On zaštitnik, hvaljen, blag i mudar. Poslao ih je vjetrom brzo, i napunio ih kišom koja donosi blagoslov. Zahvaljujte Allahu na Njegovim blagodatima pa će vam povećati Svoje blagodati, i bojte se Njega i pokajte Mu se, da biste dobili Njegov oprost i zadovoljstvo.

O vjernici, donosite što više salavata i selama na onoga koji će biti utočište ljudi na Sudnjem danu, našeg poslanika i šefadžiju Muhammeda, sallallahu alejhi ve sellem, i njegovu porodicu, i neka je Allah zadovoljan pravovjernim halifama, svim ashabima, i onima koji ih slijede u dobročinstvu do Sudnjeg dana.

